



Inatsisartunut ilaasortaq Mariane Paviasen, Inuit Ataqtigiit

**Kuannersuarni suliassap killiffia pillugu § 37 naapertorlugu apequteqaammut 033 2021-mut akissuteqaat**

26-05-2021  
Suliap nr. 2021 - 9885

Kuannersuarni suliassap killiffia pillugu Inatsisartut suleriaasianni § 37, imm. 1 naapertorlugu apequtit matuma kinguliani allassimasut Naalakkersuisunut nassiuppatit.

Postboks 930  
3900 Nuuk  
Tlf. (+299) 34 68 00  
Fax (+299) 43 02  
E-mail: an@nanoq.gl  
www.naalakkersuisut.gl

**1. Naalakkersuisooqatigiit isumaqatigiissutaani Kuannersuarni aatsitassarsiorniarneq unitsinneqassasoq isumaqatigiissutaavoq, suliap taassumap killiffia Naalakkersuisup saqqummiussinnaannerpaa?**

**Akissut:** Kuannersuarni Greenland Mineralsip suliassaa Aatsitassanut ikummatissanullu inatsit aammalu atugassarititaasut immikkut ittut ingerlatseqatigiiffimmut piumasarineqartut naapertorlugit sularineqartussaavoq. Naalakkersuisut inatsisit atuuttut malillugit sulipput aammalu atugassarititaasut aatsitassarsiorniluni misissuinissamut akuersissummi aalajangersagaasut malillugit. Ingiaqatigisaanik inatsisip aamma aatsitassarsiorniluni misissuinissamut akuersissutip killissaasa iluanni uranimik pīaanissap – aamma Kuannersuarni suliassami - pinngitsoortinnissaanut periarfissat suunersut Naalakkersuisut nalilersuleruttorpaat.

**2. Kuannersuarni aatsitassarsiorniarnerup tusarniutigineqarnera suli ingerlanneqarpoq Naalakkersuisunit tusarniutiginninnerup ingerlaannarnissaa naatsorsuutigineqarpa? (01.Junip 2021-p tungaanut).**

**Akissut:** Greenland Mineralsip Aatsitassanut ikummatissanullu inatsit naapertorlugu pīaanissamut qinnuteqaatiminnut atatillugu tamanut ammasumik tusarniaanerup ingerlanneqarnissaa pisinnaatitaaffigaa, taassumalu naammassineqarnissaanut Naalakkersuisut peqataassapput.

Piffissap tusarniaaffiusup sivitsorneqarnissaa Naalakkersuisut pilersaarutigaat, taamaalilluni taanna 13. september 2021 tikillugu ingerlassalluni, tassanilu tusarniaalluni ataatsimiititsinerit sapaatit akunneranni 34-mi aamma/imaluunniit 35-mi ingerlanneqassasut pilersaarutigineqarluni.

Maannamut tusarniaalluni ataatsimiititsinerni ingerlanneqartuni, qunusaarinerit pissutigalugit politikerinik peqataasoqarsimanngilaq. Tamanna Naalakkersuisut iluarserusuppaat, tassami aatsitassanut ikummatissanullu inatsit malillugu tusarniaalluni ataatsimiititsinerni politikerinik peqataasoqarnissaa pingaaruteqartorujussuartut isigineqarmat.

Taamaattumik piffissap tusarniaaffiusup sivitsorneqarnissaa kissaatigineqarpoq, taamaalillutik Naalakkersuisut attuumassuteqartut tusarniaalluni ataatsimiititsinerni nammineerlutik peqataanissamut, aammalu apeqqutit Greenland Mineralsip avatangiisitigut inuiaqatigiinnilu piujuartitsinissamut nalilersuineranut atatillugu qaqqineqartut pingaaruteqartut pillugit innuttaasut toqqaannartumik attaveqatiginissaannut, periarfissaqalissallutik.

### **3. Maannamut tusarniaannerup unitsinneqannginnera sumik peqquteqarpa?**

**Akissut:** Aatsitassanut ikummatissanullu inatsit malillugu Naalakkersuisut peqataatillugit tusarniaalluni ataatsimiititsinerit ingerlanneqarnissaat pininnaatitsissummik pigisaqartup pininnaatitaaffigaa. Tamatuma kingorna paaanissamut akuersissut tunniunneqarsinnaanersoq, Naalakkersuisut aalajangiiffigisinnaalissavaat.

Tusarniaannerup ingerlanerata unitsinnissaa Naalakkersuisut kissaatigissagaluarpassulluunniit, maannakkut inatsimmi killissaliussat iluanni tamanna ajornarpoq.

### **4. Naatsorsuutigissavarput Kuannersuarni aatsitassarsiorniarneq unitsinneqassasoq?**

**Akissut:** Aatsitassanik pinngoqqaatinillu qinngornernik ulorianartunik akulinnik Kalaallit Nunaanni paaanissap unitsinnissaa Naalakkersuisut kissaatigaat. Tassani aamma Kuannersuarni aatsitassarsiorfissaq pineqarpoq.

Kuannersuarni aatsitassarsiorfissaq pillugu ajornartorsiut ataasiakkaatigut qanoq iliuuseqarfigineqassanersoq, sunik periarfissaqarnerisugut misissuinermi Naalakkersuisut qanoq inerniliissanersut apeqqutaassaaq. Tamatumunnga takuuk apeqqummut 1-imut akissuteqaat.

### **5. Tusarniaanermut akissuteqarnissaq innuttaasunit, soqutigisaqatigiinniillu piffissamik atuiffigineqarnissaa pisariaqavittutut isigineqarnerluni suliniut unitsinneqartussatut pilersaarutaasoq Naalakkersuisunit siunniunneqarnikuusoq nalunagu?**

**Akissut:** Naalakkersuisut neriutigaat innuttaasut, soqutigisaqaqatigiit inuussutissarsiortullu tusarniaanermut akissuteqaatinik nassiussissasut imaluunniit tusarniaalluni ataatsimiititsinerni apeqqutinik ilassuteqassasut. Siullertut ajornartorsiutit maannakkut tusarniaanermi sammineqartut ilai amerlasuut ataatsimut isigalugu Kalaallit Nunaanni aatsitassarsiorfissanut atatillugu avatangiisinut aamma inuiaqatigiinni piujuartitsinissamik nalilersuinermut ataatsimut isigalugu attuumassuteqarput. Taamaattumik Naalakkersuisut suliap ingerlaqqinnissaanut ataatsimut isigalugu pingaarutilinnik ilassutissanik pissarsisinnaapput.

Tamatuma saniatigut tusarniaanermut akissuteqaatit aatsitassanut pinngoqqaatinullu qinngornernik ulorianartunik akulinnut tunngasut, pingaartumik avatangiisinut peqqissutsimullu ajornartorsiutinut tunngassuteqartut, pingaaruteqartorujussuartut Naalakkersuisut isigaat aammalu tamanna pillugu oqariartuuteqartoqarnissaa ilassuteqartoqarnissaalu neriutigalugu

Inussiarnersumik inuulluaqqusillunga

  
Naaja H. Nathanielsen